

四庫全書薈要

• 乾隆御覽本

集部

欽定四庫全書薈要

集部

范文正集卷二

臣王杰詳校
詳校官助教員常循



范文正集目錄

卷一

古賦
古詩

卷二

古詩

卷三

律詩



目錄
卷四

律詩

卷五

義論議贊

卷六

頌述序

卷七

記書

卷八

書

卷九

書

卷十

祭文

卷十一

碑銘

卷十二

墓誌銘

卷十三

墓誌銘

卷十四

墓表
書碑陰

卷十五

表

卷十六

表

卷十七

表

卷十八

狀

卷十九

狀
劄子

卷二十

賦

別集

卷一

古詩

卷二

賦

卷三

賦

卷四

序 啟 劄子 贊

補編

奏議 序 尺牘 詩餘

奏議

卷上

治體

卷下

邊事

雜奏

尺牘

卷上

家書

卷中

交游

卷下

交游

臣等謹案文正集二十卷別集四卷補編一

卷奏議二卷尺牘三卷宋范仲淹撰仲淹字希文其先邠人徙蘇州官至樞密副使參知政事謚文正事蹟具宋史本傳所著詩文本名丹陽集凡詩賦五卷雜文十五卷元祐四年蘇軾為之序淳熙丙午鄱陽從事綦煥校

定舊刻又得詩十七篇為遺集附於後即今別集其補編五卷則

國朝康熙中裔孫能濬所搜輯也仲淹貫通經術平生以傳道自任集中所載易義二十餘條皆深得經旨其他議論政治之文類皆明白切當可起而行蘇軾稱其天聖中所上執政萬言書天下傳誦攷其平生所為無出此者可謂有本之言矣其集元明屢有刊本久

而不存康熙乙酉其二十一世孫時崇為廣
西巡撫屬族人校正與奏議尺牘等合刻行
之焉乾隆四十三年二月恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書

欽定四庫全書
目錄

范文正集原序

慶曆三年軾始總角入鄉校士有自京師來者以魯人石守道所作慶曆聖德詩示鄉先生軾從旁竊觀則能誦習其詞問先生以所頌十一人者何人也先生曰童子何用知之軾曰此天人也耶則不敢知若亦人耳何為其不可先生奇軾言盡以告之且曰韓范富歐陽此四人者人傑也時雖未盡了則已私識之矣嘉祐二年始舉進士至京師則范公歿既葬而墓碑出讀之至流

涕曰吾得其為人蓋十有五年而不一見其面豈非命也歟是歲登第始見知於歐陽公因公以識韓富皆以國士待軾曰恨不識范文正公其後三年過許始識公之仲子今丞相堯夫又六年始見其叔彛叟京師又十一年遂與其季德孺同僚於徐皆一見如舊且以公之遺橐見屬為敘又十三年乃克為之嗚呼公之功德蓋不待文而顯其文亦不待敘而傳然不敢辭者自以八歲知敬愛公今四十七年矣彼三傑者皆得從之游而

公獨不識以為平生之恨若獲挂名其文字中以自託
於門下士之末豈非疇昔之願也哉古之君子如伊尹
太公管仲樂毅之流其王霸之畧皆定於畎畝中非仕
而後學者也淮陰侯見高皇帝於漢中論劉項短長畫
取三秦如指諸掌及佐帝定天下漢中之言無一不酬
者諸葛孔明卧草廬中與先主策曹操孫權規取劉璋
因蜀之資以爭天下終身不易其言此豈口傳耳受嘗
試為之而僥倖其或成者哉公在天聖中居太夫人憂

已有憂天下致太平之意故為萬言書以遺宰相天下
傳誦至用為將擢為執政考其平生所為無出此書者
今其集二十卷為詩賦二百六十八為文一百六十五
其於仁義禮樂忠信孝弟蓋如饑渴之於飲食欲須臾
忘而不可得如火之熱如水之溼蓋其天性有不得不
然者雖弄翰戲語率然而作必歸於此故天下信其誠
爭師尊之孔子曰有德者必有言非有言也德之發於
口者也又曰我戰則克祭則受福非能戰也德之見於

怒者也元祐四年四月二十一日龍圖閣學士朝奉郎
新知杭州軍州事蘇軾啟

范文正集卷一

宋 范仲淹 撰

古賦

明堂賦

臣聞明堂者天子布政之宮也在國之陽于巳之方廣大乎天地之象高明乎日月之章崇百王之大觀揭三宮之中央昭壯麗於神州宣英茂於皇猷頒金玉之宏

度集人神之丕休故可祀先王以配上帝坐天子而朝諸侯者也粵自蒼牙開極黃靈耀德巢穴以革棟宇以植徹太古之弊明大壯之則風雨攸止宮室斯美將復崇高乎富貴之位統和乎天人之理乃聖大造明堂肇起明以清其居堂以高而視壁廊焉而四達殿歸焉而中峙禮以潔而儉必表之以茅教以清而流故環之以水暨二帝之述焉合五府而祭矣逮夫夏禮秩秩奉以世室商祀穆穆制以重屋神禹卑宮階以一尺之崇成

湯受命革以三尺之盛赫赫周堂制度景彰七筵兮南
北之廣九筵兮西東之長堂并包於五室室辨正於五
方面明堂而背北室左青陽而右總章耽然太室儼乎
中黃都徽名之在南取盛德之向陽或謂厥堂惟一厥
室惟九闔闔其三十六戶疏達兮七十二牖亦規上而
天覆復矩下而坤厚近郊之宮廣而能受通天之宇高
而弗偶八方象其幅員九陞參其前後桓桓焉聽政之
廟應辰而周彰趺趺焉承天之柱列宿而相望環林兮

蕙蕙圓海兮泱泱既方舟而經梁復素飾其迴牆陳位
序以有嚴議法象而必臧示邦域之景鑠期人神之樂
康左有辟雍天子學宮墳籍浩以明備文物森其會同
奉三壽以勗天下之孝設三之以勸諸侯之風右有靈
臺庶民子來若經始於神明乃占候於昭回天之道也
惟默默以有象聖之心也蓋惕惕於無災此三雍之大
者故百世以欽哉若夫約周之禮稟夏之正天子升青
陽之位體大德之生彼相協謀有司奉行慶賜必均歷

象必明布農事於準直習舞德於和平止伯益之伐木
禁蚩尤之稱兵惟倉廩兮賑天之窮惟幣帛兮禮邦之
英無隱不彰無潛不亨蒙蕩蕩之至仁浸灝灝之醇精
此明堂之春也萬物為之榮又若炎以繼天曦以永日
始於仲呂之管復於清宮之律天子乃登諸明堂暨夫
太室命盛樂以象德致大雩以祈實升高明而有豫定
心氣而無逸靜百官之事驅五穀之疾無索於闕無難
於門止北伐之威以助養於生生導南風之和以飾喜

於元元此明堂之夏也萬物為之繁爾乃象正火位德
王金行鴻漸于以南嚮穀萬斯而西成天子乃居總章
之輿奏清商之聲圖有功而專任詰不義而徂征脩法
制以謹收藏之令養衰老以惻搖落之情同我度量平
予權衡人社以崇厚兆民報本之志神倉以秘示萬邦
致孝之誠此明堂之秋也天下為之清及夫蟲介時分
虎威夕永詩人發其涼之詠日官賓可愛之景天子乃
北堂以居南面而省錫飮烝之慶從祀寒之請於是戒

門閭備邊境勞三農於休息警百辟於恭靖關市必易
宮室必整無用之器斯徹無事之官必省飭國典以俟
來歲之宜講武經以肅萬邦之屏此明堂之冬也天下
為之靜斯乃順其時與物咸宜適其變使民不倦者也
稽夫宗祀之文大享之辰上儀乎皇皇盛節兮彬彬比
於郊也我則取文之勝方其廟也我則取質之純損益
其禮尊嚴其親五天之座曄曄以陳五帝之席奕奕而
倫惟太室之位乃上帝之神作配者先王從祀者五臣

樽俎離離玉幣莘莘牲牢之舉既遵於夏后疏果之薦
復本於周人禮無不當誠無不臻聖人於是出齋宮而
肅肅被法服而循循酌一獻以從質躬百拜以表寅司
儀實相樂正攸賓進俎豆之吉蠲羅奠簋之輪囷六樂
咸在統美乎列皇八風相盪同和乎大鈞下舞上歌蹈
德詠仁非常之祭駿及者萬國莫大之孝蟻懷者兆民
於是神醉其德人樂而極太史書於策大夫頌於國頌
曰明堂崇之明王祀之禮以成之樂以歌之光天之下

教以化之若夫元朔會同羣后對越穆穆乎舜門之闕
晰晰乎宣燎之發帝時待旦而久求衣以先紆黃組冠
通天建日月服乾坤佩干將升崑崙進山嶽之主當雲
龍之軒正聖人之大寶示天下之有尊巍巍焉負扆而
立濟濟焉辨色而入太常正其等衰九賓序其名級中
階之前三公屹然應門之外九采察焉阼階之東諸侯
以同西階之西諸伯以齊門東北面者子之位門西東
上者男之次東門之外則有樂浪蟠木九夸之國西面

而北上西門之外則有蒙汜大秦六戎之屬南上而東
向南門之外則有朱垠越裳八蠻之族唯北是望北門
之外則有葷粥幽陵五狄之種唯東是尚於是旣旣旅
進鏘鏘肆覲嚮明者蓋取諸離觀光者受之以晉君臣
之位定禮樂之道振雅韶以奏文鐸以徇皆望雲而就
日必歌堯而頌舜上和而下樂金聲而玉潤況乎晨光
赫曦天顏弗違冕絃兮霞集玉帛兮川歸盛乎王庭之
聲明煥乎天家之光輝若北辰之會衆星咸繁繁而在

共如太陽之臨多露普湛湛而將晞莫不君三揖於上
臣載拜於下行典禮揚風雅訪雋良議窮寡人曷幽而
覆盆賢局側而遺野於以盛名器於以休宗社署聖法
於圓闕馳神教於方夏皇哉耀今昔之榮觀至哉數億
兆之純嘏故曰揖讓而治天下者明堂之謂也惜乎三
代以還智者閒閒諸儒靡協議者喋喋而皆膠其增損
忘禮樂之大本泥於廣狹廢皇王之大業使朝廷茫然
有邇遠之歎惘然有中輟之議殊不知五帝非沿樂而

興三王豈襲禮而治為明堂之道不必尚其與行明堂之義不必盡其制適道者與權忘象者得意大樂同天地之和豈匏竹而已矣大禮同天地之節豈豆蓬之云爾自漢魏之下暨隋唐之際堂或三五之上道非三五之世蓋不取其厚而取其薄不得其大而得其細享配之文或然未分政教之烈斯焉弗聞是則帝道不施胡取乎總期皇德不隆胡取乎合宮故夫明堂之設也天子居之日慎日思思之何也萬微存乎消息慎之何也

兆靈繫之安危繇是惟克念以作聖思堯舜之齊名懼
巍巍之弗逮乃孜孜於雞鳴唯至平之休代思阜財於
吾民懼四維之有艱尚瘡痍而百辛故聖人之寶儉弗
下剝而上侈思寡費而薄索民庶幾於格恥惟下武之
太寧亦省躬於干戈取諸豫於四方慨風雲以長歌惟
知人其古難思濟濟乎賢者蓋舉一於臯陶乃連茹於
天下惟好生之至德思與物而為春懼幽陋之靡及常
咨命於仁人惟及人之一德始若晦而彌彰故三五之

君子騰茂質而無疆惟皇極之大範思天下而與平懼
萬物之或差持我心於誠衡然後見天下齊於無體和
於無聲麗眉而壽吾何仁之有含哺而嬉吾何力之為
但淵淵縣縣無反無偏浸淳澤以成若樂鴻化於自然
此明堂之道也蓋無得而稱焉我國家凝粹百靈薦馨
三極東升煙於岱首西展琮於汾側未正天神之府以
讓皇人之德祖考來格俟配天之儀諸侯入朝思助祭
之職豈上聖之謙而愚臣之惑也臣請考列辟之明術

塞處士之橫議約其制復其位儉不為其陋奢不為其肆斟酌乎三五擬議乎簡易展宗祀之禮正朝會之義廣明堂之妙道極真人之能事以至聖子神孫億千萬期登於斯念於斯受天之禧與天下宜而已乎

秋香亭賦

并序

提點屯田鉅鹿公就使居之北擇高而亭背孤嶽面橫江植菊以為好命曰秋香亭呼賓醕酒以落之僕賦而侑焉

鄭公之後兮宜其百祿使於南國兮鏗金粹玉倚大旆
於江干揭高亭於山麓江無煙而練迴山有嵐而屏矗
一朝賞心千里在目時也秋風起兮寥寥寒林脫兮蕭
蕭有翠皆歇無紅可凋獨有佳菊弗治弗天采采亭際
可以卒歲畜金行之勁性賦土爰之甘味氣驕松筠香
減蘭蕙露漙漙以見滋霜肅肅而敢避其芳其好胡然
不早歲寒後知殊小人之草黃中通理得君子之道飲
者忘醉而餌者忘老公曰時哉時哉我賓我來緩泛遲

歌如春登臺歌曰賦高亭兮盤桓美秋香而酤顏望飛
鴻兮冥冥愛白雲之閒閒又歌曰魯不知吾曹者將與
夫謝安不可盡歡而聿去乎東山又不知將與夫劉伶
不可復醒而蔑聞乎雷霆豈無可而無不可兮一逍遙
以皆寧

靈烏賦

并序

梅君聖俞作是賦曾不我鄙而寄以為好因勉而和之
庶幾感物之意同歸而殊途矣

靈鳥靈鳥爾之為禽兮何不高翔而遠翥何為號呼於
人兮告吉凶而逢怒方將折爾翅而烹爾軀徒悔焉而
亡路彼啞啞兮如慙請臆對而心喻我有生兮累陰陽
之含育我有質兮處天地之覆露長慈母之危巢託主
人之佳樹斤不我伐彈不我仆母之鞠兮孔艱主之仁
兮則安度春風兮既成我以羽翰眷庭柯兮欲去君而
盤桓思報之意厥聲或異警於未形恐於未熾知我者
謂吉之先不知我者謂凶之類故告之則反災於身不

告之則稔禍於人主恩或忘我懷靡臧雖死而告為凶
之防亦由桑妖於庭懼而脩德俾王之興雉怪於鼎懼
而脩德俾王之盛天聽甚邇人言曷病彼希聲之鳳皇
亦見譏於楚狂彼不世之麒麟亦見傷於魯人鳳豈以
譏而不靈麟豈以傷而不仁故割而可卷孰為神兵焚
而可變孰為英瓊寧鳴而死不默而生胡不學太倉之
鼠兮何必仁為豐食而肥倉苟竭兮吾將安歸又不學
荒城之狐兮何必義為深穴而威城苟圯兮吾將疇依

寧驥子之困於馳騫兮驚駘泰於芻養寧鵠雛之飢於
雲霄兮鵠爲飫乎草莽君不見仲尼之云兮予欲無言
累累四方曾不得已焉又不見孟軻之志兮養其浩
然皇皇三月曾何敢以休焉此小者優優而大者乾乾
我烏也勤於母兮自天愛於主兮自天人有言兮是然
人無言兮是然

古詩

謝黃總太博見示文集

松桂有嘉色不與衆芳期金石有正聲詎將羣響隨君
子著雅言以道不以時仰止江夏公大醇無小疵孜孜
經緯心落落教化辭上有帝皇道下有人臣規邈與聖
賢會豈以富貴移誰言荆棘滋獨此生蘭芝誰言鼃龜
繁獨此蟠龍龜豈徒一時異將為千古奇願此周召風
達我堯舜知致之諷諫路陞之誥命司二雅正得失五
典陳雍熙頌聲格九廟王澤及四夸自然天下文不復
迷宗師

四民詩

士

前王詔多士咸以德為先道從仁義廣名由忠孝全美
祿報爾功好爵縻爾賢黜陟金鑑下昭昭姪與妍此道
日以疎善惡何茫然君子不斥怨歸諸命與天術者乘
其隙異端千萬惑天道入指掌神心出胷臆聽幽不聽
明言命不言德學者忽其本仕者浮於職節義為空言
功名思苟得天下無所勸賞罰幾乎息陰陽有變化其

神固不測禍福有倚伏循環亦無極前聖不敢言小人
爾能臆禪竈方激揚孔子甘寂默六經無光輝反如日
月蝕大道豈復興此弊何時抑末路競馳騁澆風揚羽
翼昔多松柏心今皆桃李色願言造物者回此天地力

農

聖人作耒耜蒼蒼民乃粒國俗儉且淳人足而家給九
載襄陵禍比戶猶安輯何人變清風驕奢日相襲制度
非唐虞賦歛由呼吸傷哉田桑人常悲大弦急一夫耕

幾壘游墮如雲集一蠶吐幾絲羅綺如山入太平不自
存凶荒亦何及神農與后稷有靈應為泣

工

先王教百工作為天下器周旦意不朽刊之考工記嗟
嗟遠聖人制度日以紛窈窕阿房宮萬態橫青雲熒煌
甲乙帳一朝那肯焚秦漢驕心起陳隋益其侈鼓舞天
下風滔滔弗能止可堪佛老徒不取慈儉書竭我百家
產崇爾一室居四海競如此金碧照萬里茅茨帝者榮

今為庶人恥宜哉老成言欲攬般輸指

商

嘗聞商者云轉貨賴斯民遠近日中合有無天下均上以利吾國下以藩吾身周官有常籍豈云逐末人天意亦何事狼虎生貪秦經界變阡陌吾商苦悲辛四民無常籍茫茫偽與真游者竊吾利墮者亂吾倫淳源一以蕩頽波浩無津可堪貴與富侈態日日新萬里奉綺羅九陌資埃塵窮山無遺寶竭海無遺珍鬼神為之勞天

地為之貧此弊已千載千載猶因循桑柘不成林荆棘
有餘春吾商則何罪君子恥為隣上有堯舜主下有周
召臣琴瑟願更張使我歌良辰何日用此言皇天豈不
仁

寄題孫氏碧鮮亭

天地何風流復生王子猷黃金買碧鮮綠玉排清秋非
木亦非草東君歲寒實耿耿金石性雪霜不能老清風
乃故人徘徊過此君泠泠鈞天音千載猶得聞應是聖

賢魄鍾為此標格高節見直清靈心隱虛白粉筠多體
貌錦箴見兒童上交松桂枝下結蘭蕙叢秀氣藹晴嵐
翠光凝綠水明月白露中靜如隱君子不願湘靈泣不
求伶倫吹鳳皇得未晚蛟龍起何時蕭蕭雲水間良與
主人宜紅塵滿浮世何當拂長袂坐嘯此亭中行歌此
亭際逍遙復逍遙不知千萬歲

贈張先生

應是少微星又云嚴君平浩歌七十餘未嘗識戈兵康

寧福已大清靜道自生邈與神仙期不犯寵辱驚讀易
夢周公大得天地情養志學浮丘久鍊日月精壽存金
石性嘯作鸞鳳聲陰德不形言一一在幽明何當換金
骨五雲朝玉京有客淳且狂少小愛功名非謂鐘鼎重
非謂簞瓢輕素聞前哲道欲向聖朝行風塵三十六未
作萬人英乃聞頭角者五神長戰爭禍福有倚伏富貴
多虧盈金門不乏雋白雲宜退耕人間有嵩華棲之比
蓬瀛芝田春藹藹玉澗晝錚錚峯巒多秀色杉桂一何

清月壑認瑤池花巖列錦城朱絃冉冉奏金醴遲遲傾
相勸綺季徒頽玉信縱橫此樂不尋常何苦事浮榮願
師先覺者遠遯濯吾纓

明月謠

明月在天西初如玉鈎微一夕增一分堂堂有餘輝不
掩五星耀不礙浮雲飛徘徊河漢間秀色若可飡清風
起叢桂白露生堦蘭高樓望君時為君拂金徽奏以堯
舜音此音天與稀明月或可聞顧我亦依依月有萬古

金定四月全書
卷一
光人有萬古心此心良可歌憑月為知音

上漢謠

真人累陰德聞之三十天一朝鸞鶴來高舉為神仙冉
冉去紅塵飄飄凌紫煙下有脩真者望拜何拳拳願君
銀臺上侍帝玉案前當有人間問請為天下宣自從混
沌死淳風日衰靡百王道不同萬物情多詭堯舜累代
仁絃歌始能治桀紂一旦非宗廟自然一作白日毀是非既
循環興亡亦繼軌福至在朱門禍來先赤子嘗聞自天

意天意豈如此何為治亂間多言歷數爾願天賜吾君
如天千萬春明與日月久恩將雨露均帝力何可見物
情自欣欣人復不言天天亦不傷人天人兩相忘逍遙
何有鄉吾當飲且歌不知義與黃

清風謠

清風何處來先此高高臺蘭叢國香起桂枝天籟迴飄
飄度清漢浮雲安在哉萬古鬱結心一旦為君開有客
慰所思臨風久徘徊神若遊華胥身疑立天台極渴飲

沆瀣大暑執瓊環曠如攜松丘騰上煙霞遊熙如揖莊
老語入逍遙道朱絃鼓其薰可以解吾民滄浪比其清
可以濯吾纓願此陽春時勿使飄暴生千靈無結愠萬
卉不摧榮庶幾宋玉賦聊廣楚王情

書海陵滕從事文會堂

東南滄海郡幕府清風堂詩書對周孔琴瑟親義黃君
子不獨樂我朋來遠方言蘭一相接豈特十步香德星
一相聚直有千載光道味清可挹文思高若翔笙磬得

同聲精色皆激揚栽培盡桃李棲止皆鸞皇琢玉作鎮圭鑄金為干將猗哉滕子京此意久而芳

上都行送張伯玉

上都有聖人日月一以新曄曄天下才西走堯舜賓百谷望東浸萬星依北辰直者為之轅曲者為之輪一材不復遺況此席上珍南山張公子氣象清且淳懷有綺繡文朝無瓜瓞親寸心如鐵石不羞賤與貧買臣起白社賈誼富青春寶此金轆轤去去延平津

鳴琴

思古理鳴琴聲聲動金玉何以報昔人傳此堯舜曲

馴鷗詠

萬物有常性性無不貴生風翔與駿奔一一遠害情
彼沙上鷗皎皎霜雪明月宿滄洲靜日浴滄浪清何以
狎溪人溪人淡無營循循自飲啄往往相逢迎徘徊兩
無猜何慕亦何驚客有懷依依雲水言將歸逐爾羣鷗
樂羣鷗爾勿飛此心未忘者天機非殺機

古鑑

磨此千年鑑朱顏清可覽君看日月光無求照人膽

贈樊秀才

知古之孫

五代雲雷屯九野皆龍戰開國如棊枰皇極何由建太祖乘天飛大發光華旦樊公江表來經綸速如電微子入姬周倉皇救塗炭四海乃大同萬里聞薰風禮樂與征伐出自明光宮大勲未大賞積慶宜無窮李廣不封侯繼世多英雄公有承家子所至神明理復有起家孫

一見知千里和氣十洲春清流九江水非有神筆夢繁
繁文何綺天子青春朝列鼎招英髦明年桃李開禹浪
如霞高之子可變化咫尺登金鰲始知祖德長光輝傳
佩刀

贈基者

何處逢神仙傳此基上旨靜持生殺權密照安危理接
勝如雲舒禦敵如山止突圍秦師震諸侯皆披靡入險
漢將危奇兵翻背水勢應不可隕關河常表裏南軒春

日長國手相得喜泰山不礙目疾雷不經耳一子貴千金一路重千里精思入於神變化胡能擬成敗繫之人吾當著棊史

歲寒堂三題

堯舜受命於天松柏受命於地則物之有松柏猶人之有堯舜也是故聖人觀有心而制禮體後凋以辨義丁公神遇鑒寐形焉陶相真棲風韻在矣前言往行豈徒然哉吾家西齋僅百載二松對植扶疎在軒靈根不孤

本支相茂卓然有立儼乎若思霜霰交零莫能屈其性
絲桐間發莫能擬其聲不出戶庭如在林壑某少長北
地近還平江美先人之故廬有君子之嘉樹清陰大庇
期於千年豈徒風朝月夕為耳目之資者哉因命其西
齋曰歲寒堂松曰君子樹樹之側有閣焉曰松風閣美
之以名居之斯逸由我祖德貽厥孫謀昆弟雲來是仰
是則可以為友可以為師持松之清遠恥辱矣執松之
勁無柔邪矣稟松之色義不變矣揚松之聲名彰聞矣

有松之心德可長矣念茲在茲我族其光矣子子孫孫
勿翦勿伐惟吾家之舊物在歲寒而後知天地憐其材
而況於人乎作詩紀之以永長也

歲寒堂

我先本唐相奕世天衢行子孫四方志有家在江城雙
松儼可愛高堂因以名雅知堂上居宛得山中情目有
千年色耳有千年聲六月無炎光長如玉壺清於以聚
詩書教子脩誠明於以列鐘鼓邀賓樂昇平綠煙亦何

知終日在簷楹太陽無偏照自然虛白生不向搖落地
何憂歲崢嶸勗哉肯構人處之千萬榮

君子樹

二松何年植清風未嘗息天矯向庭戶雙龍思霹靂豈
無桃李姿賤彼非正色豈無蘭菊芳貴此有清德萬木
怨搖落獨如春山碧乃知天地威亦向歲寒惜有聲若
江湖有心若金璧雅為君子材對之每前席或當應自
然化為補天石

松風閣

此閣宜登臨上有松風吟非絃亦非匏自起簫韶音明
月萬里時何必開綠琴鳳皇下雲霓鏘鏘鳴中林淳如
葛天歌太古傳於今潔如庖羲易洗人平生心安得嘉
賓來當之共披襟陶景若在僊千載一相尋

贈都下隱者

梅福隱市門嚴平居卜肆乃知神仙徒非必煙霞地異
哉西山人逍遙京洛塵門多長者車察脈如有神軒皇

萬餘載此術了然在精意洞五行飛名落四海結舍擬
滄洲東池接御溝蘭芳披幽徑琴樽在小舟清夜泛月
華宛是江湖遊他日上雲去茲為黃鶴樓

范文正集卷一

范文正集卷二

宋 范仲淹 撰

古詩

和人遊嵩山十二題

公路澗

曹公與表銜
常爭據此地

嵩高發靈源北望洛陽注清流引河漢白氣橫雲霧英
雄惜此地百萬曾相距近代無戰爭常人自來去

拜馬澗

子晉登仙遺馬於此鄉人見之皆拜

傳聞王子仙澗邊遺一驥當時青雲路雞犬亦可致未
必真龍媒悠悠在平地

二室道

太室何森聳少室欲飛動相對起雲霞恍如遊仙夢何
以寵此行行歌降神頌

自峻極中院步登太室中峯

白雲隨人來翩翩疾如馬洪崖與浮丘襟袂安足把不

來峻極遊何能小天下

玉女牕

窈窕玉女牕想像玉女粧皎皎月為鑑飄飄霓作裳莫
學陽臺夢無端惑楚王

玉女搗衣石

但見巖前砧誰聞月下杵金文與鐵色璨璨知千古試
問搗衣仙何如補天女

天門

天門絕境遊熙然揖灝氣下顧莽蒼間雲雷走平地天
威不遠人孰舊本作莫起欺天意

天門泉

天門有靈泉埃塵未嘗至日月自高照雲霞亦輝庇惟
抱夷齊心飲之可無愧

天池

嶽頂見天池神異安可度勿謂無波濤雲雷有時惡乘
此澄清間吾纓可以濯

三醉石

巍巍八仙壇上有三醉石憐此高陽徒如樂華胥域憔悴澤邊人獨醒良可惜

峻極上寺

徘徊峻極寺清意滿烟霞好風從天來吹落桂樹花高人物外猶屬梵王家

中峯

嵩嵩最高處逸客偶登臨迴看日月影正得天地心念

此非常遊千載一披襟

聽真上人琴歌

銀潢耿耿霜稜稜西軒月色寒如冰上人一叩朱絲繩
萬籟不起秋光凝伏羲歸天忽千古我聞遺音淚如雨
嗟嗟不及鄭衛兒北里南隣競歌舞競歌舞何時休師
裏堂上心悠悠擊浮金憂鳴玉老龍秋啼蒼海底幼猿
暮嘯寒山曲隴頭瑟瑟咽流泉洞庭蕭蕭落寒木此聲
感物何太靈十二銜珠下仙鵠為予再奏南風詩神人

和暢舜無為為余試彈廣陵散鬼物悲哀晉方亂乃知
聖人情慮深將治四海先治琴興亡哀樂不我適坐中
可見天下心感公遺我正始音何以報之千黃金

和僧長吉湖居五題

湖山

湖山滿清氣賞心甲吳越晴嵐起片雲晚水連初月漁
父得意歸歌聲等閒發

水月

千尋月脚寒湖影淨於天忽如常娥宮俯仰見嬋娟更
約中秋夕長津無寸烟

筠亭

為愛碧鮮亭入夏敏敏至臺榭競生煙獨有清涼意高
岡鳳不來幽人此沉醉

風笛

風引湖邊笛馬知非隱淪一聲裂雲去明月生精神無
為落梅調留寄龍頭人

渚蓮

武陵誰家子波面雙雙渡
空積心中絲未成機上素
似共織女期秋宵苦霜露

酬葉道卿學士見寄

世傳學中祿小子廼逢辰
一入諫諍司鴻毛忽其身
可負萬乘主甘為三黜人
豈量堯舜心如日照孤臣
薄責落善地雅尚過朝倫
僅同龜在泥敢冀蠖求伸
朱樓逼清江下睨百丈鱗
羨此南魚樂不忍持釣綸
為郡良優

優乏材止循循恬愉弗擾外何以慰遠民拙可存吾樸
靜可逸吾神漸得疎懶味下車將四旬嘉興風雅來觀
對如天賓感茲韶夏音佐我臺上春

和章岷從事鬪茶歌

年年春自東南來建溪先暖冰微開溪邊竒茗冠天下
武夷仙人從古栽新雷昨夜發何處家家嬉笑穿雲去
露牙錯落一番榮綴玉含珠散嘉樹終朝採掇未盈襜
唯求精粹不敢貪研膏焙乳有雅製方中圭兮圓中蟾

北苑將期獻天子林下雄豪先鬪美鼎磨雲外首山銅
瓶攜江上中冷水黃金碾畔綠塵飛紫玉甌心雪濤起
鬪余味兮輕醍醐鬪余香兮薄蘭芷其間品第胡能欺
十目視而十手指勝若登仙不可攀輸同降將無窮恥
于嗟天產石上英論功不愧階前糞衆人之濁我可清
千日之醉我可醒屈原試與招魂魄劉伶却得聞雷霆
盧仝敢不歌陸羽須作經森然萬象中焉知無茶星商
山丈人休茹芝首陽先生休采薇長安酒價減千萬成

都藥市無光輝不如仙山一啜好冷然便欲乘風飛君
莫羨花間女郎只鬪草贏得珠璣滿斗歸

和葛閣寺丞接花歌

江城有卒老且貧憔悴抱關良苦辛衆中忽聞語聲好
知是北來京洛人我試問云何至是欲語沈瀾墮雙淚
斯須收淚始能言生自東都富貴地家有城南錦繡園
少年止以花為事黃金用盡無他能却作瓊林苑中吏
年年中使先春來曉宣口勅脩花臺奇芬異卉百餘品

求新換舊爭栽培猶恐君王厭顏色羣芳只似尋常開
幸有神仙接花術更向都城求絕匹梁王苑裏索妍姿
石氏園中搜淑質金刀玉尺裁量妙香膏膩壤彌縫密
迴得東皇造化工五色敷華異平日一朝寵愛歸牡丹
千花相笑妖饒難竊藥常娥新換骨嬋娟不似人間看
太平天子春遊好金明柳色籠黃道道南樓殿五雲高
釣天捧上蓬萊島四邊桃李不勝春何況花王對玉宸
國色精明動韶景天香旖旎飄芳塵特奏霓裳羽衣曲

千官獻壽羅星辰
兌悅臨軒逾數刻
花吏此時方得色
白銀紅錦滿牙床
拜賜仗前生羽翼
惟觀風景不憂身
一心歲歲供春職
中途得罪情多故
刻木在前何敢訴
竄來江外知幾年
骨肉無音鴈空度
北人情況異南人
瀟灑溪山苦無趣
子規啼處血為花
黃梅熟時雨如霧
多愁多恨信傷人
今年不及去年身
目昏耳重精力減
復有鄉心難具陳
我聞此語聊悵悵
近曾侍從班中立
朝違日下暮天涯
不學爾曹向隅泣
人生榮辱如浮雲

悠悠天地胡能執賈誼文才動漢家當時不免來長沙
幽求功業開元盛亦作流人過梅嶺我無一事逮古人
謫官却得神仙境自可優優樂名教曾不恹恹弔形影
接花之技爾則竒江鄉卑溼何能施吾皇又詔還淳朴
組繡文章皆棄遺上林將議賜民畋似昔繁華徒爾為
西都尚有名園處我欲抽身希白傳一日天恩放爾歸
相逐栽花洛陽去

天平山白雲泉

靈泉在天半狂波不能侵神蛟穴其中渴虎不敢臨
照涵秋碧泓然一勺深游潤騰雲飛散作三日霖天造
豈無意神化安可尋挹之如醍醐盡得清涼心聞之異
絲竹不含哀樂音月好羣籟息涓涓度前林子晉罷雲
笙伯牙收玉琴徘徊不擬去復發滄浪吟乃云堯湯歲
盈盈長若今萬里江海源千秋松桂陰茲焉如有價北
斗量黃金

留題常熟頂山僧居

平湖數百里隱然一山起中有白龍泉可洗人間耳吾
師仁智心愛茲山水音結茅三十年不道日月深笑我
名未已來問無端理却指嶺邊雲斯馬贈君子

江上漁者

江上往來人但愛鱸魚美君看一葉舟出沒風波裏

送蔡挺代父之蜀

朔風豈不寒蜀道豈不難之子代親行萬里心自安劍
閣雪猶明錦江春未闌到日必詩戰重登李杜壇

鄱陽酬泉州曹使君見寄

吾生豈不幸所稟多剛腸身甘一枝巢心苦千仞翔志
意苟天命富貴非我望立譚萬乘前肝竭喉無礙意君
成大舜千古聞羶香寸懷如春風思與天下芳片玉棄
且在雙足何辭傷王章死於漢韓愈逐諸唐獄中與嶺
外妻子不得將義士撫卷起眦血一霑裳胡弗學揭厲
胡弗隨低昂干時宴安人滅然已不揚匹夫虎敢鬪女
子熊能當況彼二長者烏肯巧如簧我愛古人節皎皎

明於霜今日貶江徼多慙韓與王罪大禍不稱所損傷
纖芒盡室來官下君恩大難忘酒聖無隱量詩豪有餘
章秋來魏公亭金菊何煌煌登高發秘思聊以摅吾狂
卓有梅聖俞作邑郡之旁矯首賦靈烏擬彼歌滄浪因
成答客戲移以贈名郎泉南曹使君詩源萬里長復我
百餘言疑登孔子堂聞之金石音純純自宮商念此孤
鳴鶴聲應來遠方相期養心氣彌天浩無疆鋪之被萬
物照之諧三光此道果迂闊陶陶吾醉鄉

和謝希深學士見寄

天地久開泰過言防結括誰憐多出處自省有本末心
馬介如石可裂不可奪盡室得江行君恩與全活迴頭
諫諍路尚願無壅遏豈獨世所非千載成迂闊

廬山瀑布

靈源何太高北斗想可挹凌日五光直逗雲千仞急白
虹下澗飲寒劍倚天立闊電不得瞬長雷無敢蟄萬丈
巖崖坼一道林巒溼險逼飛鳥墜冷束山鬼泣須當截

海去獨流不相入

滕子京魏介之二同年相訪丹陽郡

長江天下險涉者利名驅二公訪貧交過之如坦途風
波豈不惡忠信天所扶相見乃大笑命歌倒金壺同年
三百人大半空名呼沒者草自綠存者顏無朱功名若
在天何必心區區莫競貴高路休防讒嫉夫孔子作旅
人孟軻號迂儒吾輩不飲酒笑殺高陽徒

送劉牧推官之兗州

相國鎮東魯

時李相公
總在兗

開閣多英豪
羨子賦從軍
壯思

如波濤當有非常遇
所得連六鼇
故人孫復之卧雲生
二毛或作梁甫吟
秋風共呼號
翩翩草檄外可與相遊
邀益以夫子心
萬物都一毫
此行名與節須似泰山高
和楊旼孤琴詠

愛此千年器如見古人面
欲彈換朱絲
明月當秋漢
我願宮商絃相應
聲無間自然召南風
莫起孤琴歎

絳州園池

絳臺史君府亭閣參園圖一泉西北來羣峯高下觀池
魚或躍金水簾長布雨怪柏鎖蛟虬醜石鬬貙虎羣花
相倚笑垂楊自由舞靜境合通仙清陰不知暑每與風
月期可無詩酒助登臨問民俗依舊陶唐古

晉祠泉

神哉叔虞廟地勝出嘉泉一源甚澄靜數步忽潺湲此
異孰可窮觀者增恭虔錦鱗無敢釣長生同水仙千家
溉禾稻滿目江鄉田我來動所思致主愧前賢大道果

能行時雨宜不愆皆如晉祠下生民無旱年

訪陝郊魏疎處士

賢哉先處士天書召不起雲夫嗣孤風復為隱君子有
石礪其齒有泉洗其耳下瞰紅塵路榮利無窮已孜孜
朝市人同在風波裏大為高士笑誓不拾青紫我亦寵
辱流所幸無愠喜進者道之行退者道之止矧今領方
面豈稱長城倚來訪卧雲人而請益諸已得無長者言
佩之玉非美

中元夜百花洲作

南陽太守清狂發未到中秋先賞月
百花洲裏夜忘歸
綠梧無聲露光滑天學碧海吐明珠
寒輝射空星斗疎
西樓下看人間世瑩然都在青玉壺
從來酷暑不可避
今夕涼生豈天意一笛吹銷萬里雲
主人高歌客大醉
客醉起舞逐我歌
弗舞弗歌如老何

覽秀亭詩

南陽有絕勝城下百花洲
謝公創危亭

紫微謝希深領
郡日建此亭

屹在高城頭盡覽洲中秀歷歷銷人憂作詩刻金石意
垂千載休我來亭臺壞何以待英游試觀荊棘繁欲步
瓦礫稠嗟嗟命良工美材肆爾求曰基復日構落成會
中秋開樽揖明月席上皆應劉敏速迭唱和醺酣爭獻
酬老子素不淺預茲年少儔九日重登臨涼空氣氣收
風來鴈聲度雲去山色留西郊有潭菊滿以金船浮雅
為君子壽物外真悠悠過則與春期春時良更優熠熠
衆卉明衮衮新泉流蕭鼓動地喧羅綺傾城遊五馬不

行樂州人為之羞亭焉詎可廢願此多賢侯

祠風師酬提刑趙學士見貽

先王制禮經祠為國大事孟春祭風師刺史敢有二齋
戒升于壇拜手首至地所祈動以時生物得咸遂勿鼓
江海濤害我舟楫利旱天六七月會有雷雨至慎無吹
散去坐使百穀悴高秋三五夕明月生天際乃可驅雲
烟以喜萬人意願君入薰絃上副吾皇志阜財復解慍
即為天下賜八使重古禮作詩歌祭義誠欲通神明非

徒獎州吏賢哉推此心良以警有位

依韻和安陸孫司諫見寄

甫

穰下故都今善藩沃衍千里多豐年孫公頃以清淨化
我來代之慙二天人物高傳卧龍里神仙近接弄珠川
漢光舊烈山河在徘徊弔古良依然二十八將固不朽
風雲一代皆忠賢我亦明時得君者出處十載功不前
尚得州麾養衰疾優游豈減居林泉因逢故人作宴喜
琴樽風月夕不眠之翰詩來若金石重於我輩何其偏

相其直道了無悔寧爭護屈與鵬鸞

送鄖鄉尉黃通

少年好逸驥老者重安車爭先尚逐逐致遠費徐徐勿
言一尉卑千戶繫條舒外矜固不足內樂則有餘子游
與季路作邑寧歛歔五斗對萬鍾所問道何如

依韻和襄陽王源叔龍圖見寄

高車赴南峴做郊主東道風采喜一見布素情相好屈
指四十秋于今歲寒保我起為君壽善頌復善禱願盡

杯中物薄言理可到君子貴有終功名非必早朝端卿
大夫所尚賢而老世慮久乃周聖門深已造與君誓許
國無忝於祖考潔如鳳食竹樂若魚在藻安得長相親
時時一絕倒不忘平生期明月滿懷抱

依韻答賈黯監丞賀雪

今之刺史古諸侯孰敢不分天子憂自秋徂冬渴雨雪
旬奏空文慙轉郵得非郡國政未洽刺史閉閣當自尤
上賴天子仁且聖神龍奔走不俟求同雲千里結雪意

一夕密下誠如羞

俗有雪羞多
夜落之語

曉來賞心江海上東望

不見三神丘渾祛厲氣發和氣明年黍稷須盈疇烟郊
空闊獵者健酒市暖熱沽人稠光精璨璨奪劍戟清寒
拂拂生衣裘鈴齋賀客有喜色飲酣歌作擊前籌常願
帝力及南畝盡使風俗如東鄒誰言吾子青春者意在
生民先發謳

依韻答提刑張太博嘗新醞

南陽本佳處偶得作守臣地與汝墳近古來風化純當

官一無術易易復循循長使下情達窮民奚不伸此外
更何事優游歟嘉賓時得一笑會恨無千日醇客有多
聞者密法為我陳自言此靈物盡心妙始臻非徒水泉
潔大要麴蘖均暄涼體四時日月周數旬其氣芳以烈
厥味和而辛涓涓滴小槽清光能照人固可奉宗廟宜
能格天神我姑酌金罍駐此席上珍況有百花洲水木
長時新煙姿藏碧塢柳杪見朱闌兩兩鳬鴈侶依依江
海瀕晚光倒晚影一川無一塵悠悠乘畫舸坦坦解朝

紳綠陰承作蓋芳草就為茵引此杯中物獻酬交錯頻
禮俗重三爵今乃不記巡大言出物表本性還天真或
落孟嘉帽或拋陶令巾吾非葛天氏誰為劉伯倫大使
達觀者與予日相親作詩美嘉會調高繼無因但願天
下樂一若樽前身長戴堯舜主盡作羲黃民耕田與鑿
井熙熙千萬春

寄題峴山羊公祠堂

休哉羊叔子輔晉功勲大化行江漢間恩被疆場外中

國倚而安治為天下最開府多英僚置酒每高會徘徊
臨峴首興言何慷慨此山自古有游者千萬輩湮滅皆
無聞空悲歲月邁公乎仁澤深風采獨不昧于今墮淚
碑觀之益欽戴卓有王源叔文學偉當代借麾來襄陽
高懷極恬退山姿列雲端江響拂天籟行樂何逍遙覽
古忽感慨不見叔子祠蕪沒民疇內千金贖故基廟貌
重營繪裏人復其祀水旱有攸賴太守一興善比戶皆
歡快源叔政可歌又留千載愛

送河東提刑張太博

憶守姑蘇日見君已驚人翩翩幕中畫落落席上珍強
記及敏力一一精如神洎余領西帥密與羌夏隣君來
貳邊郡表裏還相親有如得四支周旋衛其身予始按
萬渠兵行百物陳而君主其事進退皆有倫羌酋八九
百醉歌喜斷斷傳告以號令再拜罔不馴作城大順川
扼胡來路津漢軍始屯集敵騎俄紛綸諸將稍畏怯偶
語辭艱辛君躍匹馬去入險將死濱持楫盡禍福虎校

靡不遵呼兵就畚插悅使咸忻忻晝夜戰且役城成未
踰旬敵乃急攻我萬衆生煙塵蒼惶被矢石遁走無遑
巡君馳奏闕下感慨動中宸是秋懷敏敗敵勢侵涇原
天地正愁慘關輔將迸奔腹心苟不守皮膚安得存予
召蕃漢兵趨邠當北門諸將切切議謂宜守塞垣惟君
力贊我咸鑄為本根全師遂鼓進連城息驚喧果釋天
子憂獎詔垂明恩予貳機衡重君掌食貨繁豈敢懈夙
夜未嘗摠笑言今叨領南陽會君乘使軒攜手百花洲

無時不開樽語論極今古情契及子孫氣同若蘭芝聲
應如簫塤浩歌忘物我劇飲無涼暄自問平生心此樂
曾幾番一旦改使節怱怱指并汾惜別固不忍贈行當
有云從來宿兵地北與胡漢分長河出紫塞太行入青
雲天然作雄屏覽者懷忠勲行府在平陽山川秀氤氲
堯民擊壤歌千古猶得聞君有經濟心潤以金石文攬
轡問風俗坐堂精典墳此道日益大行行思致君

依韻和提刑太博喜雪

南陽風俗常苦耕太守憂民敢不誠今秋與冬數月旱

二麥無望愁編氓龍遁雲藏不肯起荒祠巫鼓徒轟轟

昨宵天意驟回復繁陰一布飄寒英裁成片片盡六出

化工造物何其精散亂狂飛若倚勢徘徊緩舞如含情

千門競掃明月色萬木都坼寒梅英天上風流忽爾在

人間險阻無不平因松偶作琴瑟調過竹徐聞環珮聲

江天鳴鴈畏相失龍庭奔馬豪如驚丞相沙隄初踏練

將軍紫髯渾綴璵巖前飢煞嘯風虎海上凍死吞舟鯨

我有高樓擘雲上雙瞳一開千里明羣閭逐去疫癘遠
長遶壓下塵埃清當知有年可坐致東臯父老休營營
因招大使賞天瑞醉把羲黃向上評窮通得喪了無事
莊老器宇何難并君起作歌我起和天地和氣須充盈
當年此樂不可得與雪對舞攄平生共君學取雪好處
平施萬物如權衡

送謝景初廷評宰餘姚

世德踐甲科

先賓客先紫微俱登甲科廷評今又繼之

青紫信可拾故鄉特

榮輝高門復樹立餘姚二山下東南最名邑煙水萬人
家熙熙自翔集又得賢大夫坐堂恩信數春風為君來
綠波滿平湖乘興訪隱淪今逢賀老無文藻凌雲處定
喜江山助未能同仙舟離樽少留駐行行道不孤明月
相隨去

閱古堂詩

中山天下重韓公茲鎮臨堂上續昔賢閱古以儆今牧
師六十人冠劍竦若林既瞻古人像必求古人心彼或

所存遠我將所得深仁與智可尚忠與義可欽吾愛古
賢守馨德神祇歆典法曾弗泥勸沮良自斟躋民在春
臺熙熙樂不淫耕夫與樵子飽暖相謳吟王道自此始
然後張薰琴吾愛古名將毅若武庫森其重如山安其
靜如淵沉有令凜如霜有謀密如陰敵城一朝拔戎首
萬里擒虎豹卷韜畧鯨鯢投釜驚皇威徹西海天馬來
駸駸留侯武侯者將相俱能任決勝神所啟受託天所
謀披開日月光振起雷霆音九關支一柱萬宇覆重衾

前人何赫赫後人豈惜惜所以作此堂公意同堅金僕
思寶元初叛羌弄千鐔王師生太平苦戰誠未禁赤子
餵犬彘塞翁淚泔泔中原固為辱天子動宸襟乃命公
與僕聯使禦外侵歷歷華前弊拳拳掃妖祲二十四萬
兵撫之若青衿惟以人占天不問昂與參相彼形勝地
指掌而蹄跡復我橫山疆限爾長河潯此得喉可扼彼
宜肉就樵上前同定策奸謀俄獻琛臬巢不忍覆異日
生凶禽僕已白髮翁量力欲投簪公方青春期抱道當

作霖四夷氣須奪百代病可鍼河湟議始行漢唐功必
尋復令千載下景仰如高岑因賦閱古篇為公廊廟箴
南康軍江中落星寺

長江萬里來古寺中流起如何天上星汨汨波濤裏

范文正集卷二

謹案卷二第七頁前四行迴得東皇造化工刊本
迴訛迴據時兆文本改

第十九頁後六行過竹徐聞環佩聲刊本聞作移
謹遵

御選宋詩改



總校官庶吉士臣侍 朝

校對官編修臣沈清藻

膳錄監生臣張起隆

欽定四庫全書薈要

集部

范文正集卷三

四

詳校官助教臣常循



范文正集卷三

宋 范仲淹 撰

律詩

睢陽學舍書懷

白雲無賴帝鄉遙
漢苑誰人奏洞簫
多難未應歌鳳鳥
薄才猶可賦鵲鵲
思顏子心還樂琴
遇鍾君恨即銷
但使斯文天未喪
澗松何必怨山苗



詠史五首

陶唐氏

純衣黃冕歷星辰
白馬彤車一百春
莫道茅茨無復見
古今時有致堯人

有虞氏

成都成邑即天開
終踐堯基詠起哉
但得四門元凱至
九韶何必鳳皇來

夏后氏

景命還將伯益傳九川功大若為遷謳歌終在吾君子
豈是當時不讓賢

商人

履癸昆吾禍莫移應天重造帝王基子孫何事為炮烙
不念嘻吁祝網時

周人

斧鉞為藩忍內侵商人塗炭奈何深不煩魚火明天意
自有諸侯八百心

次韻和劉夔判官對雪

藪藪樓臺外新輝溢四遐雲中凋玉葉星際落榆花嶽
色參差露松聲髣髴加風流裁賦苑清苦讀書家霜女
慙輕格蟾娥讓素華孤鴻迷鳥道萬馬憶龍沙淨拂王
恭鼈香滋陸羽茶載歌勞郢謝一奏待鍾牙幾處和梅
賞何人為鬢嗟含毫看不足詩社好生涯

河朔吟

太平燕趙許閒遊三十從知壯士羞敢話詩書為上將

猶憐仁義對諸侯子房帷幄方無事李牧耕桑合有秋
民得袴襦兵得帥禦戎何必問嚴尤

和黃總太博上知郡杜少卿

萬石君賢再出麾猶龍川上五歌時九重執憲清規在
十鎮分憂白髮知環禁申威星拱極鈴齋舒嘯月侵帷
金臺下客思何報願上中和樂職詩

過太清宮

醜石危松半綠蘿函闕真相玉嵯峨誰言仙道求難至

自愧陰功積未多，渺渺雲霞開絳節。
雖雖鸞鳳答空歌，幾時身退瓊壇畔。
榮利匆匆奈老何。

寄餘杭全安石段少連二從事

分攜俱是佐高牙，兩地光塵自等差。
榮事日趨丞相府，道情時過老君家。
雙鴻得侶知風便，一鶴思鳴對露華。
早晚相將雲漢外，重為龍友免天涯。

送江南運使張傅度支

刑措東南始詔迴，重分邦計命欽哉。
于公已積充閭慶。

蕭相還施富國才十郡甘棠歌未歇一方流馬路初開
啟心知有嘉謨在足亂雲霓憶帝臺

堯廟

千古如天日巍巍與善功禹終平洛水舜亦致薰風江
海生靈外乾坤揖讓中鄉人不知此簫鼓謝年豐

西溪見牡丹

陽和不擇地海角亦逢春憶得上林色相看如故人

寄秦州幕明化基寺丞

同時辟命新中道改絲綸滄海人歸楚清風子在秦共
居卿月下獨得將星隣聳動軍前檄崢嶸席上珍烽烟
邊信息金鼓武精神獵度天山雪歌逢隴樹春燕臺無
限好西向自霑巾

鵬鵠在秋天

秋漢寥寥迴雄心肯木棲人間正搖落天外絕攀躋月
兔精應喪陽烏影欲齊長河匹練小太華一拳低下晒
羣毛遁橫過百鳥睽乘風俊未已空濶玉關西

觀獵

鷹犬一何驕，霜明遠近郊。
鸞皇不觸網，狐兔自充庖。
熠熠流鳴鏑，紛紛過綠髯。
雄飛侵漢下，殺氣與雲交。
翦棘爭探穴，摧林競覆巢。
惟開三面者，盛德播絃匏。

鸚鵡

堂上每云云，金籠久受恩。
思山誠有意，對主忍無言。
性比孤鸞潔，聲殊百舌繁。
雲林如一去，應喜謝朱門。

歸鴈

稻梁留不得一一起江天帶雪南離楚和春北入燕依
依前伴侶歷歷舊山川木葉程猶遠梅花信可傳子規
啼到曉鸚鵡鎖經年應羨冥冥者東風羽翼全

青郊

青郊鳴錦雉綠水漾金鱗願得郢中客共歌臺上春

射陽湖

渺渺指平湖烟波極望初縱橫皆釣者何處得嘉魚

舟中

珠彩耀前川歸來一扣舷微風不起浪明月自隨船

寄歐靜秀才

君歸一水遙魂斷木蘭橈賴有南軒竹清風慰寂寥

和韓布殿丞三首

泛湖中

平湖萬頃碧謝客一開顏待得臨清夜徘徊載月還

琴酒

絃上萬古意樽中千日醇清心向流水醉貌發陽春

漁父

月色滿滄波吾生樂事多何人獨醒者試聽濯纓歌

送識上人遊金山寺

空半簇樓臺紅塵安在哉山分江色破潮帶海聲來煙
景諸隣斷天光四望開疑師得仙去白日上蓬萊

野色

非煙亦非霧暮暮映樓臺白鳥忽點破夕陽還照開肯
隨芳草歇疑逐遠帆來誰謂山公意登高醉始迴

雜詠四首

梓人一笑白雲鄉
杞桂森森遇豫章
聞道周公繩墨在
天庭誰此議明堂

有客藍田得意歸
溪光冉冉白虹蜺
玉人豈忍言環珮
留取天王尺二圭

鏗鏗千古嶧山桐
金石聲來造化中
誰道元和無復致
為君堂上起薰風

嶺上英英向日開
帝鄉情態自徘徊
如何一施陽春雨

依舊無心歸去來

書事呈韓布殿丞

南宮曾薦牧之文，失足徒勞忽十春。
天上雲龍期際會，山中猿鶴愧因循。
無功豈不孤黃石，有道何堪憶紫萼。
少壯由來須努力，篆銘鍾鼎古何人。

西溪書事

卑棲曾未託椅梧，敢議雄心萬里途。
蒙叟自當齊黑白，子牟何必怨江湖。
秋天響亮頻聞鶴，夜海臃腫每見珠。

一醉一吟疎嬾甚溪人能信解嘲無

得李四宗易書

秋風海上憶神交江外書來慰寂寥
松柏舊心當化石
塤簫新韻似聞韶須期管鮑垂千古
不學張陳負一朝
三復荊州無限意王孫芳草路遙遙

歐伯起相訪

海涯牢落若為懷惟子相過未忍迴
勁草不隨風偃去
孤桐何意鳳飛來
罇藏金醴遲遲進匣鎖雲和特特開

萬古功名有天命浩然攜手上春臺

寄贈林逋處士

唐虞重逸人東帛降何頻風俗因君厚文章至老淳玉
田耕小隱金闕夢高真罷釣輪生蠹慵冠鑑積塵餌蓮
攀鶴頂歌雪扣琴身墨妙青囊秘丹靈綠髮新嶺霞明
四望巖笏入諸隣幾姪簪裾盛諸生禮樂循朝廷唯薦
鶚鄉黨不傷麟弔古夫差國懷賢伍相津劇談來劍俠
騰嘯駭山神有客瞻冥翼無端預薦紳未能忘帝力猶

待補天均早晚功名外孤雲可得親

酬滕子京同年

謝家風雅若為酬散吏方耽海上游疎嬾幾忘傳筆夢
寂寥仍有負薪憂欲歌蘭雪歸真隱敢向簪軒競急流
如共茂先瞻氣象莫言神物在南州

贈餘杭唐異處士

名動公卿四十秋相逢仍作旅人遊青山欲買難開口
白髮思歸易滿頭厭入市廛如海燕可堪雲水屬江鷗

故鄉知己方都督千樹春濃種橘休

時胡侍郎
守餘杭

和沈書記同訪林處士

山中宰相下巖扃靜接遊人笑傲行
碧嶂淺深驕晚翠
白雲舒卷看春晴
煙潭共愛魚方樂
樵爨誰欺鴈不鳴
莫道隱君同德少
樽前長揖聖賢清

原本看字
作戲字

諸暨道中作

林下提壺招客醉
溪邊杜宇勸人歸
可憐白酒青山在
不醉不歸多少非

題翠峯院

范蠡
舊宅

翠峯高與白雲閒
吾祖曾居水石間
千載家風應未墜
子孫還解愛青山

與人約訪林處士阻雨因寄

閒約諸公扣隱扃
江天風雨忽飄零
方憐春滿王孫草
可忍雲遮處士星
蕙帳未容登末席
蘭舟無賴寄前汀
湖山早晚逢晴霽
重待尋仙入翠屏

寄西湖林處士

蕭索遶家雲清歌獨隱淪巢由不願仕堯舜豈遣人一
水無涯靜羣峯滿眼春何當伴閒逸嘗酒過諸隣

越上聞子規

夜入翠煙啼晝尋芳樹飛春山無限好猶道不如歸

送李紘殿院赴闕二首

寂寥門巷每相過親近賢人所得多今日九重天上去
睢陽孤客奈愁何

霜露丘園不忍違三年月日速如飛金門乍入應垂淚

因挂朝衣憶彩衣

送邢昂處士南遊

落落崆峒一大儒
四方心逸憶江湖
東南賴有林君復
萬里清風去不孤

送丁司理赴明州

仙家枝葉令威孫
南去司刑庇越民
金闕道書微旨在
獄多陰德是真人

道書謂升真者
皆須曾為獄官

送鄞江竇尉

片帆飛去若輕鴻一霎春潮過浙東
王謝江山久蕭索
子真今為起清風

送常熟錢尉

姑蘇臺下水如藍天賜仙鄉奉旨甘
梅淡柳黃春不淺
王孫歸思滿江南

試筆

偶緣疎拙得天真豈問前途屈與伸
車馬縱能欺倦客
江山猶可助騷人
懶如叔夜書盈几
狂似淵明酒滿巾

況有南憲姬易在此心那更起纖塵

送真元二上人歸吳中

歸心不可奪千里故園春及見市朝事却思江海人煙
波方得伴松月定為隣願結虎溪社休休老此身

寄題許州錢相公信美亭

華構高軒敞名湖一面分星辰居上相鼓吹燕中軍山
色來嵩室風光徹汝墳杉篁涵晚翠蘭茝薦時薰坐嘯
頻乘月歸懷幾望雲迴臨黃霸俗遠味仲宣文萬戶方

開國三階復致君斯亭比棠樹千載頌清芬

送何白節推宰晉原二首

盛府兼名邑榮歸指故林多年望鄉淚萬里倚門心江
館春寒薄山程晚翠深板輿迎侍日桃李正芳陰

此行深惜別所喜是寧親祖帳千門曉鄉關錦國春鳥
歌疑勸酒山態似迎人我絕南陔望因兄淚滿巾

送刁紡戶掾太常下第

時為太常
發解官

精鑒本非深英僚暫此沉火炎方試玉沙密偶遺金豈

累青雲器猶孤白雪音敢希
蘇季子潛有激儀心

憶杭州西湖

長憶西湖勝鑑湖春波千頃綠如鋪
吾皇不讓明皇美
可賜疎狂賀老無

寄林處士

片心高與月徘徊豈為千鍾下釣臺
猶笑白雲多事在
等閒為雨出山來

依韻酬母澁推官

聖門非入室文陣敢爭盟不意棲雲閣何才隸月卿珍
羣憐未至霄鶚引脩程直舍有仙味祕庭無俗聲午陰
宮樹綠宵刻禁鍾清奉制歌三秀稱觴聽六英恩輝孤
易感交結淡難成新髮鑑中改舊山天際橫纓思漁父
濯春伴隼旗行桃浪觀秦塞薰風省舜城幾多興廢跡
重疊古今情進退思先覺蹉跎畏後生見詒如美袞欲
報乏英瓊淨揖澄江練高窺擢露莖復驚聞正始終仰
輔登閔好勵圖南志翱翔覽四瀛

送石曼卿

河光嶽色過秦關
英氣飄飄酒滿顏
賈誼書成動西漢
謝安人笑起東山
亨途去覺雲天近
舊隱回思水石閒
此道聖朝如不墜
疏封宜在立譚間

送何涉秀才

蜀道歸來萬里身
上堂嘉慶動諸隣
賢良詔下先生起
休向成都問卜人

八月十四夜月

光華豈不盛賞宴尚遲遲天意將圓夜人心待滿時已
知千里共猶訝一分虧來夕如澄霽清風不負期

送吳安道學士知崇州

一麾輕去奉蘭羞共惜清賢豈易求筮易暗驚鳴鶴遠
賦詩深望白駒留古來經緯心皆曉閒處光陰髮半秋
長孺之才同吏隱相寬頻上海邊樓

時羣長孺
倅通判

謫守睦州作

重父必重母正邦先正家一心回主意十口向天涯銅

虎恩猶厚鱸魚味復佳聖明何以報沒齒願無邪

赴桐廬郡淮上遇風三首

聖宋非強楚清淮異汨羅平生仗忠信盡室任風波舟楫顛危甚蛟鼉出沒多斜陽幸無事沽酒聽漁歌

妻子休相咎勞生險自多商人豈有罪同我在風波一棹危於葉傍觀亦損神他時在平地無忽險中人

送韓瀆殿院出守岳陽

仕宦自飄然君恩豈欲偏纔歸劍門道忽上洞庭船墜

絮傷春日春濤廢夜眠岳陽樓上月清賞浩無邊

出守桐廬道中十絕

隴上帶經人金門齒劍臣雷霆日有犯始可報君親
君恩泰山重爾命鴻毛輕一意懼千古敢懷妻子榮
妻子屢牽衣出門投禍機寧知白日照猶得虎符歸
分符江外去人笑似騷人不道鱸魚美還堪養病身
有病甘長廢無機苦直言江山藏拙好何敢望天閭
天閭變化地所好必真龍軻意正迂闊悠然輕萬鍾

萬鍾誰不慕意氣滿堂金必若枉此道傷哉非素心
素心愛雲水此日東南行笑解塵纓處滄浪無限清
滄浪清可愛白鳥鑑中飛不信有京洛風塵化客衣
風塵日已遠郡枕子陵溪始見神龜樂優優尾在泥
蕭灑桐廬郡十絕

蕭灑桐廬郡烏龍山靄中使君無一事心共白雲空
蕭灑桐廬郡開軒即解顏勞生一何幸日日面青山
蕭灑桐廬郡全家長道情不聞歌舞事遶舍石泉聲

烏龍

山泉實

通公署

蕭灑桐廬郡公餘午睡濃人生安樂處誰復問千鍾

蕭灑桐廬郡家家竹隱泉令人思杜牧無處不潺湲

蕭灑桐廬郡春山半是茶新雷還好事驚起雨前芽

蕭灑桐廬郡千家起畫樓相呼採蓮去笑上木蘭舟

蕭灑桐廬郡清潭百丈餘釣翁應有道所得是嘉魚

此郡

魚少
而嘉

蕭灑桐廬郡身閒性亦靈降真香一炷欲老悟黃庭

蕭灝桐廬郡嚴陵舊釣臺江山如不勝光武肯教來
新定感興五首

數仞黃堂上題名僅百賢孤高宋開府千載可拳拳
山水真名郡恩多補諫官中間好田錫風月亦盤桓
風物皆堪喜民靈獨可哀稀逢賢太守多是謫官來
去國三千里風波豈不賒迴思洞庭險無限勝長沙
江上多嘉客清歌進白醪靈均良可笑終日著離騷

遊烏龍山寺

高嵐指天近遠溜出山遲萬事不到處白雲無盡時異
花啼鳥樂靈草隱人知信是棲真地林僧半雪眉

江干閒望

江干日清曠寓目一措筇落葉信流水歸雲識舊峯蘭
蓀誰共采鳬鴈自相從莫愛蘋風起波來千萬重

和章岷推官同登承天寺竹閣

僧閣倚寒竹幽襟聊一開清風曾未足明月可重來晚
意煙垂草秋姿露滴苔佳賓何以佇雲瑟與霞杯

齋中偶書

狂愚多苦口幽遠獨甘心
言路有餘責權門無去音
忘憂曾扣易思古即援琴
此意誰相和寥寥鶴在陰

留題江秀才舊居

結舍近滄洲江山不外求
我來明月夜更得主人留

依韻酬周駸太博同年

孰敢先懷富貴圖良時須惜幾
嗟吁衆心可致巍巍主
上意思平兩兩符不稱內朝裨
耳目多慙外補救皮膚

子陵灘畔觀漁釣無限殘陽媚綠蒲

依韻荅胡侍郎見寄

千年風采逢明主一寸襟靈慕昔賢
待看朝廷興禮讓天衢何敢鬪先鞭

桐廬郡齋書事

千峯秀處白雲驕吏隱雲邊豈待招
數仞堂高誰富貴一枝巢隱自逍遙
杯中好物閒宜進林下幽人靜可邀
莫道官清無歲計滿山芝朮長靈苗

留題方干處士舊居

某景祐初典桐廬郡有七里瀨子陵之釣臺在而乃
以從事章岷往構堂而祠之召會稽僧悅躬圖其像
於堂洎移守姑蘇道出其下登臨徘徊見東嶽絕碧
白雲徐生云方干處士之舊隱遂訪焉其家子孫尚
多儒服有楷者新策名而歸因留二十八言又圖處
士像於嚴堂之東壁楷請刊詩于其左

風雅先生舊隱存子陵臺下白雲村唐朝三百年冠蓋

誰聚詩書到遠孫

時裔孫楷方
登進士科

范文正集卷三

范文正集卷四

宋 范仲淹 撰

律詩

依韻酬章推官見贈

姑蘇從古號繁華，却戀巖邊與水涯。
重入白雲尋釣瀨，更隨明月宿詩家。
山人驚戴烏紗出，溪女笑偎紅杏遮。
來蚤又拋泉石去，茫茫榮利一吁嗟。

蘇州十詠

泰伯廟

至德本無名宣尼一此評能將天下讓知有聖人生南
國奔方遠西山道始亨英靈豈不在千古碧江橫

木蘭堂

堂上列歌鐘多慙不如古却羨木蘭花曾見霓裳舞

樂白

天為蘇州刺史嘗教此舞

洞庭山

吳山無此秀乘暇一遊之萬頃湖光裏千家橘熟時平
看月上早遠覺鳥歸遲近古誰真賞白雲應得知

虎丘山

昔見虎耽耽今為佛子巖雲寒不出寺劍靜未離潭幽
步蘿垂徑高禪雪閉菴吳都十萬戶煙瓦亘西南

閶門

吳門聳閭闔迎送每躋攀一水帝鄉路片雲師子山落
鴻漁釣外斜柳別離間白傳歸休處盤桓幾厚顏

靈巖寺

吳王之離宮
也下臨太湖

古來興廢一愁人
白髮僧歸掩寺門
越相煙波空去鴈
吳王宮闕半啼猿
春風似舊花猶笑
往事多遺石不言
唯有延陵逃遁去
清名高節滿乾坤

太湖

有浪即山高無風還練靜
秋宵誰與期月華三萬頃

伍相廟

胥也應無憾至哉忠孝門
生能酬楚怨死可報吳恩直

氣海濤在片心江月存悠悠當日者千載祇慙魂

觀風樓

高壓郡西城觀風不浪名山川千里色語笑萬家聲碧
寺煙中靜紅橋柳際明登臨豈劉白滿目見詩情

南園

西施臺下見名園百草千花特地繁欲問吳王當日事
後來桃李若為言

依韻奉酬晏尚書見寄

徽音來景亳盛事聳吳鄉上象三台照高文五色章純
如登樂府淵若測天潢寒谷春重煦幽宮草特芳感知
心似血思報鬢成霜新定慙無惠姑蘇惜未康堯湯餘
水旱劉白舊風光北闕雲霓遠南園橘柚荒願聞歌畫
一敢議賦長楊碌碌朝須解循循教弗忘跡甘榮路外
情寄聖門傍幾託為魚夢江湖尚渺茫

又用前韻謝晏尚書以近著示及

祖述賢人業何因降互鄉周公舊才美夫子近文章逸

氣彌衝斗雄源甚決潢月中靈桂老春外寶芝芳遠似

天無翳清如塞有霜日星圖舜禹金石頌成康

謂真廟神御頌

也渦曲風騷盛

謂游渦之作也

營丘學校光

謂青社州學記也

至精舍

變化大手鑿洪荒崧嶽詞欺甫甘泉價掩揚滿朝當諷
誦終古豈遺忘恍若探龍際森疑履虎傍半生游此道
觀海特茫茫

陳質殿丞挽歌詞

賢者逝如斯皇天豈易知衆人皆墮淚君子欲安碑幾

世傳清白滿鄉稱孝慈賢哉生令嗣遺秀在蘭芝

送僧文光

一品山前識迢迢三十春多慚畫戟裏重見白雲人

依韻酬府判龐醇之見寄

二十年前已定交而今鵬鷗各逍遙但能賈傳親前席
何必蕭生意本朝直節羨君如指佞孤根憐我異凌霄
凌霄花名
生且有託莫將富貴移平昔彼此清心髮半凋

依韻酬吳安道學士見寄

聖君賢相正彌綸諫諍臣微敢徇身但得葵心長向日
何妨鵲足未離塵豈辭雲水三千里猶濟瘡痍十萬民
宴坐黃堂愧無限隴頭元是帶經人

依韻酬吳春卿二首

來章有鵲羸松冷之句
因以松鵲命題以答之

鵲

華亭孤立病時身終日徘徊尚海濱露掌思高還警夜
芝田音斷欲傷春千年靈氣何求藥八變奇姿已過人
莫厭在陰猶寡和九臯非晚見精神

松

亭亭百尺棟梁身寂寞雲根與澗濱寒冒雪霜寧是病
靜期風月不須春蕭蕭遠韻和於樂密密清陰意在人
高節直心時勿伐千秋為石乃知神

應制賞花釣魚

萬景嘉亨日皇心豫宴辰華林新濯雨靈沼正涵春帝
幄紛仙藹天鈞擲錦鱗洋洋頌睿唱賡頌決簪紳

過餘杭白塔寺

登臨江上寺，遷客特依依。
遠水欲無際，孤舟曾未歸。
亂峯藏好處，幽鷺得閒飛。
多少天真趣，遙心結翠微。

西湖筵上贈胡侍郎

官秩文昌貴，功名信史褒。
朝廷三老重，鄉黨二疏高。
涯業盡圖籍，子孫皆俊髦。
西湖天下絕，今日盛遊遨。

江城對月

南國風波遠，東門冠蓋回。
多情是明月，相逐過江來。

送向綜國博通判桂州

通籍三公後監州五嶺深欲知明主意將慰遠人心歲計多藏藥舟行不廢琴歸書清白最寧問橐中金

芝山寺

樓殿冠崔嵬靈芝安在哉雲飛過江去花落入城來得食鵝朝聚聞經虎夜回偶臨西閣望五老夕陽開

昇上人碧雲軒

愛此詩家好幽軒絕世紛澄宵半床月淡曉數峯雲遠意經年就微吟並舍聞只應虛靜處所得自蘭芬

郡齋即事

三出專城鬢似絲，齋中蕭灑過

一作勝

禪師近疎歌酒緣

多病不負雲山賴，有詩半雨黃花秋賞健。一江明月夜歸遲，世間榮辱何須道。塞上衰翁也自知。

同年魏介之會上作

寒苦同登甲乙科，天涯相對合如何。心存闕下還憂畏，身在樽前且笑歌。閒上碧江游畫鷁，醉留紅袖舞鳴鼉。與君今日真良會，自信麤官樂事多。

依韻酬黃灝秀才

再貶鄱川信不才子規相愛勸歸來客心但感江山助
天意難期日月迴白雪孤琴彌冷淡浮雲雙闕自崔嵬
南方歲晏猶能樂醉盡黃花見早梅

贈鍾道士

曾舉進士

人間無復動機心掛了儒冠歲已深惟有詩家風味在
一壇松月伴秋吟

道士程用之為余傳神因題

貌古神疎畫本難因師心妙發毫端無功可上凌煙閣
留取雲山靜處看

送魏介之江西提點

旌旗如火浪如鷗一路春城次第遊江上高樓欲千尺
便從今日望歸舟

遊廬山作

五老閒遊倚舳艫碧梯嵐迳好程途雲開瀑影千門掛
雨過松黃十里鋪客愛往來何所得僧言榮辱此間無

從今愈識逍遙旨一聽升沉造化鑪

瀑布

迴與衆流異發源高更孤下山猶直在到海得清無勢
鬬蛟龍惡聲吹雨電羸晚來雲一色詩句自成圖

贈廣宣大師

憶昔同遊紫閣雲別來三十二迴春白頭相見雙林下
猶是清朝未退人

移丹陽郡先遊茅山作

丹陽太守意何如先謁茅卿始下車
竭節事君三黜後收心奉道五旬初
偶尋靈草逢芝圃欲叩真關借玉書
不更從人問通塞天教吏隱接山居

贈茅山張道者

有客生平愛白雲無端年老尚紅塵
只應金簡名猶在得見仙巖種玉人

京口即事

突兀立孤城詩中別有情地深江底過
日大海心生甘

露樓臺古金山氣象清六朝人薄命不見此昇平

懷慶朔堂

慶朔堂前花自栽便移官去未曾開年年憶著成離恨

只託春風管勾來

拾遺句
作幹

依韻酬葉道卿中秋對月二首

天遣今宵無寸雲故開秋碧掛冰輪詩人不悔衣霑露
為惜清光豈易親

孤光千里與君逢最愛無雲四望通處處樓臺競歌宴

的能愛月幾人同

贈葉少卿

退也天之道東南事了人風波拋舊路花月伴閒身湖
外扁舟遠門中駟馬新心從今日泰家似昔時貧見子
登西掖攜孫過北隣白雲高閣曙淥水後池春樽酒呼
前輩鑪香叩上真只應陰德在八十富精神

依韻答梁堅運判見寄

蔽野旌旗色滿山笳吹聲功名早晚就裴度亦書生

城大順迴道中作

三月二十七羌山始見花將軍了邊事春老未還家

依韻和延安龐龍圖柳湖

種柳穿湖後延安盛可遊遠懷忘澤國真賞即瀛洲江
景來秦塞風情屬庾樓劉琨增坐嘯王粲乍銷憂秀發
千絲墮光搖匹練柔雙雙翔乳鷺兩兩睡馴鷗折翠贈
歸客濯清招隱流宴回銀燭夜吟度玉關秋勝處千場
醉勞生萬事浮王公多雅故

某與龍圖公同年
復為延安交政

思去共

仙舟

和延安龐龍圖寄岳陽滕同年

優游滕太守郡枕洞庭邊幾處雲藏寺千家月在船疎
鴻秋浦外長笛晚樓前旋撥醕頭酒新烹縮項鰯宦情
須淡薄詩意定連縣迴是偷安地仍當飽事年只應天
下樂無出日高眠豈信憂邊處胡兵隔一川

時宣撫
寄嵐軍

與張燾太博行忻代間因話江山作

數年風土塞門行說着江山意暫清求取罷兵南國去

滿樓蒼翠是平生

過長安醉別資政鄭侍郎

鄉關交復親把酒且逡巡
共上青雲路相看白髮人有
為須報國無事即頤神
故素幾云在風音莫厭頻

依韻酬光化李簡夫屯田

老來難得舊交游莫歎樽前兩鬢秋
少日苦辛名共立晚年恬退語相投
龔黃政事聊牽強元白隣封且唱酬
附郭田園能置否與君乘健早歸休

依韻酬太傅張相公見贈

出處曾無致主功
南陽為守地猶雄
醉醒往日慙漁父
得失今朝賀塞翁
七里河邊歸帶月
百花洲上嘯生風
卧龍鄉曲多賢達
願預逍遙九老中

依韻酬益利鈐轄馬端左藏

濫登清顯遇公朝
豈有才謀可致堯
拙守自慙成木強
宦遊誰歎僅蓬飄
醉來多謝提壺勸
歸去寧煩杜宇招
好樂當年開口笑
此心無事愧重霄

依韻酬邠州通判王稷太博

南豳日日接英標公外追隨豈待招惡勸酒時圖共醉
痛羸基處肯相饒一拋言笑如何遣頻得音書似不遙
獨上西樓為君久滿城明月會雲銷

依韻酬李光化見寄

南陽偃息養衰顏天暖風和近楚關欲少禍時當止足
得無權處始安閒心憐好鳥來幽院目送微雲過別山
此景此情聊自慰是非何極任循環

寄安素高處士

吏隱南陽味日新
幕中文雅盡嘉賓
滿軒明月清譚夜
共憶詩書萬卷人

酬李光化見寄二首

交親莫笑出麾頻
不任纖機只任真
遠護玉關猶竭力
入陪金鉉敢周身
素心直擬圭無玷
晚節當如竹有筠
道本逍遙惟所適
吾生何用護求伸

萬里承平堯舜風
使君尺素本空空
庭中無事吏歸早

野外有歌民。意豐石鼎鬪。茶浮乳白海。螺行酒盞上。波
紅宴堂未盡嘉賓興。移下秋光月色中。

依韻酬李光化敬懷

列宿專城且自娛。清名善最即前途。江山樂國誠難會。
風月詩家的不辜。未必晚成輸早達。好將高笑代長吁。
公餘更勵經邦業。思為清朝贊禹謨。

和李光化秋詠四首

曉

牆外轆轤響樓前河漢歌曙光和月色猶記早朝時

晝

日色清如照前林葉未零海東新隼至一點在青冥

晚

晚色動邊思去年猶未歸戍樓人已冷目斷望征衣

夜

春色人皆醉秋光獨不眠君看明月下何似落花前

送黃瀨員外

三十餘年交舊心相逢那復議升沉
卑飛塵土味誠薄
達官風波憂更深自古榮華渾一夢
即時歡笑敵千金
追陪未久還離索
早晚軒車重見尋

和并州大資政鄭侍郎秋晚書事

太原兵重壓強胡
莫對秋風憶鱸
萬里天聲揚紫塞
十年人望在黃樞
定應松柏心無改
自信雲龍道不孤
應笑病夫何所補
獨能安坐養桑榆

和提刑趙學士探梅三絕

蕭條鵬後復春前雪壓霜欺未放妍昨日倚欄枝上看
似留芳意入新年

靜映寒林晚未芳人人欲看壽陽粧玉顏須傍韶春笑
莫關嚴風與惡霜

百花爭早孰過梅天與芳時豈待催莫惜黃金置清賞
隔年春色為君開

和太傅鄧公歸遊武當見寄

三提相印代天工鄧國歸來耀本封此日神仙丁令鶴

幾年霖雨武侯龍酬恩定得祠黃石談道須期會赤松
莫慮故鄉陵谷變武當依舊碧重重

即席呈太傅相公

鳳池三入冠台躔致了昇平一品閒白傳歌詩傳海外
晉公桃李滿人間上都雲遠經時別故國春濃幾度還
太史占天應有奏壽星光彩近南山

紀送太傅相公歸闕

搢紳誰敢望差肩獨向昌期協半千首會雲龍游少海

親扶日月上中天碧油兩就元戎鎮黃閣三提冢宰權
坐致唐虞成大化退居師傳養高年閒披丹訣開鑪竈
醉度清歌被管絃同榜幾人登將相滿朝今日羨神仙
松楸雜草思純孝里巷揮金過昔賢歸赴誕辰知兌說
輕安拜舞壽觴前

依韻和提刑張太傅寄梅

數枝梅寄寂寥人多謝韶華次第均穰下此花留未發
待君同賞後池春

又和賞梅

故人為使富天才相與抽毫賦早梅氣豔未勞橫玉笛
風光先合倒金罍龍頭欲寄交情遠林下初逢病眼開
必若和羹有遺味花王應亦命公台

依韻答王源叔憶百花洲見寄

芳洲名冠古南都最惜塵埃一點無樓閣春深來海鷺
池塘人靜下仙鳧花情柳意憑誰問月彩波光豈易圖
漢上山公發新詠許昌何必詫申湖

申或作西

獻百花洲圖上陳州晏相公

穰下勝遊少此洲聊入詩百花爭窈窕一水自連漪
潔白憐翹鶯優游羨戲龜闌干紅屈曲亭宇碧參差
倒影澄波底橫煙落照時月明魚競躍春靜柳閒垂
萬竹排

霜仗千荷卷翠旗菊分潭上近

菊花潭在郡之西郊因有菊潭門復有菊潭鎮近取

菊植于洲中洲有高臺遂命之曰菊臺

梅比漢南遲

京洛而南至鄧始有梅馬梅比襄陽又晚

一岸鵲依人喜汀鷗不我疑綵絲穿石節

襄鄧間舊俗正月二十二

日士女游河取小石通中者用綵絲穿之帶以為祥

羅襪踏青期素髮頻來醉滄

浪減去思步隨芳草遠歌逐畫船移繪寫求真賞緘藏
獻已知相君那肯愛家有鳳皇池

依韻答青州富資政見寄

樞府當年日贊襄隱然一柱在明堂親逢英主開前席
力與皇家正舊章直道豈求安富貴純誠惟欲助清光
龔黃政事追千載齊魯風謠及萬箱偉望能令中國重
奇謀曾壓北方強故人待看調元後乞取優游老洛陽

依韻答并州鄭大資政見寄

制節重并汾淹留又見春年高成國老道在樂天真風
韻應如舊精明迴絕倫致君心未展寧是式微人

過陳州上晏相公

曩由清舉玉宸知今覺光榮冠一時曾入黃扉陪國論
重求絳帳就師資談文講道渾無倦養浩存真絕不衰
獨媿鑄顏恩未報捧觴為壽獻聲詩

和運使舍人觀潮二首

何處潮偏盛錢唐無與儔誰能問天意獨此見濤頭海

浦吞來盡江城打欲浮勢雄驅島嶼聲怒戰貔貅萬疊
雲纔起千尋練不收長風方破浪一氣自橫秋高岸驚
先裂羣源怯倒流騰凌大鯢化浩蕩六鼇遊北客觀猶
懼吳兒弄弗憂子胥忠義者無覆巨川舟

把酒問東溟潮從何代生寧非天吐納長逐月虧盈暴
怒中秋勢雄豪半夜聲堂堂雲陣合屹屹雪山行海面
雷霆聚江心瀑布橫巨防連地震羣檣望風迎踊若蛟
龍鬬奔如雨雷驚來知千古信迴見百川平破浪功難

敵驅山力可并伍胥神不泯憑此發威名

依韻和蘇州蔣密學

餘杭偶得借麾來山態雲情病眼開此樂無涯誰可共

詩仙今日在蘇臺

白樂天謂韋蘇州為詩仙

依韻和孫之翰對雪

江干往往臘不雪今喜紛紛纔孟冬迺知王澤寔及遠
益明天意先在農有年預可慰四海大瑞且當聞九重
況此湖山滿清思與君交唱若為慵

依韻和并州鄭宣徽見寄二首

錢塘作守不為輕況是全家住翠屏名品久參卿士月
部封全屬斗牛星仁君未報頭先白故老相看眼倍青
最愛湖山清絕處晚來雲破雨初停

西湖載客恣游從湖上參差半佛宮迴顧隙駒曾不息
沉思樽酒可教空層臺累榭皆清曠萬戶千門盡鬱蔥
向此行春無限樂却慙何道繼文翁

依韻答蔣密學見寄

東南為守慰衰顏憂事渾祛樂事還鼓吹夜歸湖上月
樓臺晴望海中山奮飛每羨冥鴻遠馳騁那慙老驥閑
此日共君方偃息是非榮辱任循環

依韻和同年朱兵部王賓客交贈之什

鶴禁蘭宮達了身高居南闕重為隣西園冠蓋時時會
北海樽罍日日親共棄榮華拋世態同歸清靜復天真
一如劉白東都下更得裴公作主人

登表海樓

卷四
一帶林巒秀復奇，每來凭檻即開眉。
好山深會詩人意，留得夕陽無限時。

石子澗二首

鑿開奇勝翠微間，車騎笙歌暮未還。
彥國才如謝安石，他時即此是東山。

飛泉落處滿潭雷，一道蒼然石壁開。
故老相傳應可信，此山雲出雨須來。

依韻答韓侍御

雖叨世契與隣藩東道瞻風御史尊鄭館昔時延下客

予執卷時即
進端公之門

于家今日見高門

端公之先君嘗
作金陵獄掾

我居方

面榮為懼君向臺端直且溫彼此中懷蘊金石不須銷
黯動離魂

謝柳太博惠鴈

新詩遺鴈指真經對此仙標詎敢輕萬里華亭思去伴
千年遼海識歸程雞羣與處曾非辱鴈路將翔孰謂榮
獨愛九臯嘹唳好聲聲天地為之清

知府孫學士見示和終南監宮太保道懷五首

因以綴篇

玉皇近侍請脩真
賜得南山十里雲
樽有聖賢聊自慰
鼎多龍虎復誰分
謝家山色朝晡見
陶隱松風寤寐聞
萬物已齊無一事
獨醒惟笑衆醺醺

要路拋來自寡尤
高懷卷去白雲收
玉緣祕寶須藏密
蘭為奇香却在幽
仙骨豈曾移靜節
帝心終是竭嘉猷
紅霞綠竹忘機地
未免天家下詔求

漢陂高興自飄飄何必天台渡石橋
潭上藥靈多餌菊
林間詩逸半書蕉
勤歌蘭珮招逋隱
懶事塵纓逐宋僚
客有赤松盟約在
異時猿鶴不相遼

瑤壇日月靜中長
詩思時時逸謝塘
神枕自成仙島夢
朝衣猶有御爐香
三元祕簡侵星奏
五嶺靈芽待雪嘗
金闕九重留不住
高風何處是嚴光

門外煙嵐紫閣橫
九衢風土更何情
籬邊醉傲淵明飲
隴上歌隨桀溺耕
三樂放懷千古重
萬鍾回首一毫輕

鵬鷁共適逍遙理誰復人間問不平

贈方秀才

楷

高尚繼先君
品居與俗分
有泉皆漱石
無地不生雲
隣里多垂釣
兒孫半屬文
幽蘭在深處
終日自清芬

依韻和龐殿院見寄

吳門歛歲減繁華
蕭索專城未足誇
柳色向秋迎使館
水聲終夜救田車
丘山在負思朝寄
毫髮經心愧道家
不似桐廬人事少
子陵臺畔樂無涯

范文正集卷四

謹案卷三第十五頁後三行金門齒劍臣刊本劍
作諫據校宋本改

卷四第五頁前二行何妨驚足未離塵刊本驚訛
驚據時兆文本改

第六頁前四行鄉黨二疏高刊本疏訛疎案此用
漢書疏廣疏受事今據改

第六頁後四行樓殿冠崔嵬刊本冠訛觀據時兆
文本改

第十七頁前五行因有菊潭門刊本脫潭字謹遵
御選宋詩增

第二十二頁後三行高尚繼先君刊本高尚二字
誤倒據時兆文本改正



總校官庶吉士臣侍朝

校對官編修臣沈清藻

謄錄監生臣張起隆